



## 四川第二

革命之起由川亂川亂由鐵路收歸國有國有政策始於張之洞成於盛宣懷

網在綱不但本篇骨節皆靈全首作螺鋒塔勢如裘挈領如

書皆籠罩得起○成字通篇眼目○前代以政策乖謬而亡國獨清以政策正當而亡國昔人以蕭規曹隨爲美德獨宣懷以蕭規曹隨而得罪文於此等分際致爲分明從不隨世俗爲毀譽

宣懷博通時

務爲北洋大臣李鴻章所識拔創辦新政事舉績著至光緒二十二年遂以津海關道充督辦蘆漢鐵路大臣二十八年宣懷與美商合興公司訂約修粵漢鐵路既籤約築路矣湘鄂粵紳商議自築力爭湖廣總督張之洞助之卒廢約之洞之主廢約非拒外資實欲擠宣懷

奪之權

着語無多情事畢著是謂峻潔宣懷把持商約路電大權久爲人所忌其時謀奪其權者非惟

張公項城最有力也

於是粵漢鐵路川漢鐵路均歸商辦既數

年四省集資力薄勢漫難遽成之洞復謀借債築川漢粵漢兩路於三十四年十一月奏上報可宣統元年草合同旣籤押矣而之洞遽卒美人屢催履約郵部以四省拒款塘塞之至宣統二年冬各省路工仍遲滯無成而籌款之法川則按租抽股湘更抽及米鹽房屋田畝各雜捐民不堪命川董事施典章侵蝕股款二百餘萬爲川紳甘大璋杜德輿等所參奏輿論譁然十二月詔授盛宣懷爲郵傳部尙書宣懷外授意四品京堂鄭孝

胥條議鐵路國有利益揭之報紙以回視聽內與度支  
部尙書載澤相結極言鐵路商辦有百害無一利且恐  
終不成應仿外國制收歸國有一事權時載澤方用事  
陰助之更風給事中石長信奏言以正當之事而用許  
多陰謀反使人疑其不正此其所以敗也鐵路有幹路有支路支路可許商修幹路必  
歸國有從前規畫未善全國路政錯亂紛歧不分枝幹  
不量民力一紙呈請輒許商修乃數年以來粵則收股  
及半造路無多川則倒賬甚鉅叅追無着湘鄂則開局  
多年徒資坐耗竭萬民之脂膏虛糜侵蝕恐曠時愈久  
民累愈深一誤何堪再誤宜請明白曉諭昭示天下除

枝路仍准商修外所有幹路均歸國有定爲政策事下郵傳部當是時政府方釐訂官制議廢舊內閣軍機處改組新內閣更易閣臣以故宣懷久未奏覆平行亦以見  
盛之巧宦略作一頓文勢遂不

三年四月戊寅詔授慶親王奕劻爲內閣總理大臣那桐徐世昌爲內閣協理大臣同日并授盛宣懷爲郵傳大臣翌日宣懷卽奏言給事中石長信奏請鐵路收歸國有臣等悉心籌議擬自北京至漢口至廣州爲南幹自北京至張家口至恰克圖爲北幹自北京至齊齊哈爾至琿春爲東幹自正定至太原接同蒲至伊犁又自漢口至成都爲西幹而以舊有鐵路爲基

礎由國家借款籌還商股迅行修築并請將宣統三年

以前郵傳部批准商修鐵路除枝路外所有幹路前案

一律取銷詔報可並詔郵傳部度支部籌畫收回細則

迅奏聞此政策頒布後中外人士額手冀幹路可告速

成便民利國而把持各路之紳商特不便也

此以見國有政策之

正當昔人謂才學識不備不能作史作者每於事之所病必察其癥結而攻之蓋洞見垣一方人也

於是

御史趙熙歐家廉首劾盛宣懷借債賣路各罪二十餘

欵湘鄂諮議局及京朝官亦抗爭時革職直隸總督端

方方家居戊子詔起端方充督辦粵漢川漢鐵路大臣

庚寅郵傳部度支部奏言

連載三疏毫無壅滯之嫌良由氣盛足以驅遣之且三疏

刪去則事實不完具

查前大學士張之洞與英法美德所定之借

款草合同於宣統元年四月簽字因病未奏出缺兩年以來各省拒款延擱至今而四國銀行屢催履約難於應付是以本年四月十一日欽奉諭旨取銷前案另訂合同遵卽按照草合同與四國銀行磋商原議五釐息九五扣借英金六百萬磅仍之原議建造鐵路幹線由武昌起至宜章止又由廣水經襄陽荆門至宜昌止枝路由漢陽至荊門止今改議將漢荆枝路六百里刪除而添築宜昌至夔州之難工六百里以爲抵補限三年造竣籲押後六月內開工原議鐵路將來接觸或造枝

路須借外資時。則先儘銀行團承辦。今改議爲先用華資自造。如借外資。倘銀行團所訂條款與他家同。則先以銀行團承辦原議。購買木材鋼軌。須一半購自外國。今改爲自行製造原議。此項借款分儲滙豐德華滙理銀行。今改議儲於交通大清銀行。原議借款二十五年償畢。今改爲四十年。但十年後即可全還。以上各節。磋商數月。舌敝唇焦。較原約挽回權利頗多。詔允由郵傳部簽押。同日郵傳部復奏言。川路股款虧倒過鉅。先後爲資政院及鄧鎔等所參奏。均奉旨着郵傳部查核具奏。查該路虧倒漏款。約分三項。一爲正元兆康謙餘晉。

益升寶康慶餘德大裕源等商號共倒銀一百四十萬兩以上各錢莊本非殷實商號該路董事施典章分存鉅款已屬不合然猶可諉爲疏忽乃臣部調查施典章除私以公司名義向正元借銀十萬兩又自借兆康銀十萬兩外并查有十七萬兩一款私自移存滙豐銀行且德大號於宣統元年八月倒閉而施典章於二年三月尙向該號存款厚大號於二年三月倒閉而施典章於四月仍轉期交存詐僞顯然無從遁飾一爲施典章與利華銀行買辦陳逸卿私相授受暗訂合同貸款至六十萬之多而利華洋行并未簽字朦混侵蝕尤屬顯

然一爲施典章購藍格志火油股票銀八十五萬二千  
餘兩浮報股票價中飽十二萬餘兩復將股票在外押  
借銀二十九萬餘兩查該路存滙款共三百五十萬施  
典章虧挪各欵竟至二百萬兩而股票銀八十五萬餘  
兩尙不在內甘大璋原奏稱此次路欵係四川民按畝  
加捐敲筋擊髓而來竭小民之脂膏傾而付之東流非  
惟可惜抑且可憫應請飭下江蘇督撫仍提施典章到  
案先行管押勒限嚴追并飭下四川總督督同該公司  
認真清理該省畝捐之公欵至該公司駐京總理喬樹  
枏詳加查核尙無扶同作弊情事惟滙款倒虧事前毫

無覺察。咎實難辭。應撤銷其總理。詔報可。并下四川總督刊刻謄黃。停止畝捐。其三年四月以前已收之款。由郵傳部督辦鐵路大臣查明妥擬細則奏聞。當是時。四川省商民均抗爭。川尤甚。爲後文三省漸熄  
川獨紛擾伏線立保路同志會。公舉諮議局副議長蕭湘。代表入都。聯湘鄂京朝官。

立鐵路聯合會。上書政府。而諮議局更要求王人文代奏。暫緩接收。人文本護督。恐激變。允之。五月癸卯。詔鐵路國有既定爲政策。斷無反汗之理。該諮議局不明此意。輒肆要求。必所收路股。侵蝕已多。不能掩飾。該署督目擊情形。應所深悉。乃竟輒爲代奏。殊屬不合。着傳旨。

嚴行申飭川人聞之愈激昂未幾湘撫楊文鼎亦爲諮議局代請詔復申飭也戊午度支部郵傳部奏稱粵漢鐵路光緒三十二年改歸商辦不惜鉅資贖銷美國借款合同實係張之洞主之宣統元年又與四國訂立借款合同議辦川漢粵漢兩鐵路亦係張之洞主之豈好爲其難哉亦實見商辦之難成數年以來鄂路並無尺寸寸料湘路線甚長集資甚少至川粵收股均達一千數百萬兩乃六年之久粵僅造一百五十里川路已通车者僅三十餘里未通车者僅八十餘里延曠虛糜在商民受害無窮在國防關係尤鉅臣等仰體聖意俯察

輿情但求於國事有益決不與小民爭利擬將粵湘川鄂各公司股票盡數收回由度支部郵傳部特出國家鐵路股票六釐給息惟粵路全係商股糜費太甚票價不及五成現從優發還六成其虧耗之四成并許發與無利股票俟路成獲利分十年攤還湘款共五百數十萬內商股一百萬所成之路由涿州至長沙一百餘里已經完工約計其數耗費無多應將商股一百萬兩照數發還其餘租捐各款允發保利股票年息五釐五年後分十五年攤還鄂商股共一百十四萬餘元現尙存銀九十一萬餘元允照數歸還其因振耀動用者亦允

發保利股票川路宜昌等工已用之四百餘萬元發保  
利股票餘七百餘萬是否入股聽便詔報可王人文楊  
文鼎既後先爲諮詢局代奏奉嚴譴鄂粵大吏識朝旨  
不敢諍則設法阻遏紳商開會聚眾而請求朝廷優還  
股款及度支部郵傳部奏定籌還路股湘鄂最優風潮  
漸熄卽粵亦無大爭執矣獨川人謂鐵路商修乃先皇  
所許不得無故收回且處分商股厚薄不同益紛擾千里  
來龍崩騰奔赴至過峽處必有一束地氣之所以聚而不散也作者善相地移其術以爲文故起伏伸縮皆現龍形三省事勢漸熄文勢亦隨之  
一曲下面抽出川亂乃倍覺有力川自趙爾巽去後  
詔其弟川滇邊務大臣趙爾豐爲總督而以布政使王

人文充川滇邊務大臣爾豐不卽來人文權督篆川事之起人文以將去不欲拂輿情鎮亂遇事委蛇政府深惡之促爾豐速來閏六月乙巳爾豐始至成都川人沸騰已數月矣李稷勳者川路駐宜總理也自鐵路國有卽與郵傳部商訂移交工款郵部招與密議仍令接主宜歸路工川人謂稷勳并未經總公司知會股東會議決及川督命令擅自達部仍用川訾築宜歸路要爾豐代奏黜退稷勳爾豐初至亦重輿論爲上達矣而郵傳部復奏請欽派李稷勳管理宜歸路事川人聞之謂郵部蔑法欺天置全川出資築路商民於不顧益忿不可

遏

極力爲成字設色反振革命

七月丙寅朔全城罷市罷課人民泣

戴景皇帝靈主焚香游行街市呼籲匐伏督轅者數萬人并聲言從此不納賦不出雜捐抵股息爾豐命司道府縣官慰解之如故川紳復公舉劉聲元阮垣李孔揚黎廣芬代表入都陳情辛丑鐵路股東會會長顏楷副會長張瀾復請爾豐代奏鐵路暫歸商辦俟資政院開會由政府提交議決爾豐以眾怒難遏復鑒於人文之被嚴譴也乃與將軍玉崑副都統奎煥提督田振邦布政使尹良提學使劉廷琛提法使周善培巡警道周樾勸業道胡嗣芬合詞奏言伏查川路自奉改歸國有之

命歷經前護督王人文及爾豐反覆開解輿情洶洶仍懷疑慮此次代奏罷黜宜昌總理李稷勳郵傳部復奏改欽派羣情大激致有初一日罷市罷課之舉爾豐等日集紳民竭力開導而羣疑已結萬眾哀憤禍機四伏若不速籌解決是以一路發其難而全局蒙其害且該股東會此次所陳係爲法律上之請求應懇聖明俯鑒民隱暫予准歸商辦俟九月資政院開會提交議決爲期至邇與其目前迫令交路激生意外何如待交院議稍得從容政府初以人文懦冀爾豐來可鎮亂及接此奏大失望載澤盛宣懷主嚴懲諸紳而總理奕効協理